

Waliofanywa Kuwa Wana na Binti

Kwa kuwa alitangulia kutuchagua, ili tufanywe wanawe kwa njia ya Yesu Kristo, sawasawa na Uradhi wa mapenzi yake, Na usifiwe utukufu wa neema yake, ambayo ametuneemesha katika huyo Mpendwa. Waefero 1:5, 6.

Kabla ya kuwekwa misingi ya dunia agano lilifanywa kwamba wote kwaliokuwa watiifu, wote ambao kupitia neema tele iliyotolewa wawe watakatifu katika tabia na bila lawama mbele za Mungu kwa kuitumia neema hiyo, wapate kuwa watoto wa Mungu.

Tunapata kila kitu kutokana na neema, neema ya bure, neema bora. Neema katika agano iliagiza kufanywa kwetu kuwa wana. Neema katika Mwokozi ilitekeleza ukombozi wetu, kuzaliwa kwetu upya na kufanywa kwetu kuwa warithi pamoja na Kristo.

Tunapoamini kikamilifu kwamba sisi ni Wake kwa kuasilishwa-kufanywa kuwa wana, tunaweza kuionja ladha ya mbinguni. ... Tunaukaribu Naye na tunaweza kuwa na mazungumzo matamu pamoja Naye. Tunaona picha dhahiri ya upole na huruma Yake na mioyo yetu inavunjwa na kuyeyushwa kwa kuutafakari upendo ule ambao tumepewa. Tunamhisi hasa Kristo anayekaa ndani ya roho. Tunakaa ndani Yake na tunajisikia tuko nyumbani pamoja na Yesu. ... Tuna hisia yenye utambuzi wa upendo wa Mungu na tunapumzika katika upendo Wake. Hakuna lugha inayoweza kuueleza, inapita elimu yote-maarifa yote. Tu umoja pamoja na Kristo, uzima wetu umefichwa pamoja na Kristo katika Mungu. Tunauhakika kwamba Yeye aliye uzima wetu atakapodhihirika, ndipo nasi tutadhihirishwa pamoja Naye katika utukufu. Kwa ujasiri mkuu tunaweza kumwita Mungu Baba yetu.

Wote waliozaliwa katika familia ya mbinguni ni ndugu wa Bwana wetu kwa namna ya pekee. Upendo wa Kristo huwaunganisha pamoja washiriki wa familia Yake na popote pale upendo huo unapoonekana uhusiano wa Mungu unadhihirishwa....

Upendo kwa mwanadamu ni udhihirisho wa duniani wa upendo wa Mungu. Ilikuwa ni kwa ajili ya kuupandikiza upendo huu, ili kutufanya kuwa watoto wa familia moja, Mfalme wa utukufu alikuwa umoja pamoja nasi. Maneno Yake ya kuagana yatakapotimizwa, "Mpendane, kama nilivyowapenda ninyi" (Yohana 15:12); tunapoupenda ulimwengu kama ambavyo Yeye ameupenda, ndipo utume Wake kwetu umetimizwa. Tunafanywa kufaa kwa ajili ya mbingu; kwa sababu tunayo mbingu mioyoni mwetu.